

1 TESARONIENS

1 Tesaronienson Vuak Amur

Tavan iji For fu mai Korint ijia finma ijia fu fas fuon amur igi isoime e ma vierafejo ar Tesaronaika karinva iji nijiaain. Revo Tesaronaika iji fu mai bomana be ai Mesedonia guf ijia revo mai iji fu saof irif ijia. Tavan iji For fu ai Gris ijia vuak ma iji abe kuardiak vainma ijia fu e Tesaronaikako iji vuak ma iji abe kuardiaain. Fu kuardiamga e Jius roin bu Jesu ma vierafejga e Jiusbuon e mamkanuk iji buka deajidiain ijefuon bu uri For ga kaifijaf rotkuriava bu vain. Regavo rad For fu una Timoti kuama fu e iji iviakma ma vierafejo ai Tesaronaika ijia kario iji bu izegrejo iji giakafa vain. Timoti fu vainma una kekome vuak ma iji bu izegrejo iji For kuardain. Ijefuon For fu fas igi isoime e Tesaronaikako iji bu unam ise kafokafo buon roko iji biedian revo buka giriesa daro mene ma vierafenva ijefuon For fu fas igi isoime buon oimaren. Regavo fu madu Jesu Kurais fu una roko ijefuon vuak iji una uruvana nijaidiaain.

1 Tesaroniens ijia vuak kafokafo For fu isoинма ижин

1:1 For fu anadiainma ijin.

1:2–3:13 For fu buon bu ma vierafejo ijefuon Godon oimarenma ijin.

4:1-12 E ma vierafejo ijiebuon unam ma iji bu kekfuon ijin.

4:13–5:11 Jesu fu madu una rokon ijefuon vuak ijin.

5:12-28 Foron vuak radkma iji fu nijaidiaainma ijiga fu anadiainma ijin.

1 For nar Sairas ko Timotina fas igi isoime e iji ja ai Tesaronaika ijia afuime Jesu ma vierafejo iji nijiav. E iji ja God Asoij ijiga E Bomana Jesu Kuraison efifaf. Regavo no vierafe God fu tavan bog ma rediame mukorigia samuagdiaga ja afuime kariokfuon.

For fu izeg e Tesaronaikako bu God ma vierafejo ijefuon Godon oimarenma ijin

2 Ijefuon tavan bog no sirimamejo no ja vierafene joifuon Godon oimarev. **3** No God Asoinuvuon iji no sirimamejo noka ja vierafej. Ijefuon maiji ja Jesu Kurais ma vierafejo ijefuon jakak ik jon mukorigia rej revo madu izeg ja jon oijmanamivo ijefuon jakak vajai fian abeknum ifenamiv. Regavo madu izeg E Bomana Jesu Kurais fu una ruakfuon ja vierafejo iji jakak arevo bakin revo jakak griesame ma vieraferenum kegoij. **4** Regavo efnun God fuka ja bomana oimiaainma ijefuon fun usuibe ja kege uniaainmado ja una efuon rek. **5** Ijefuon Godon vuak ma iji no abe kuardiaainva iji nom nor abe kuardiaainva bakin revo fun Godon Kaven Akai ijar vuak iji abe darokma kuardiamga ja faime ma vieraferen. Regavo jan vierafe izeg no jana ijia karioknum irerag no reoinva iji no jon ma ijefuon ijeg ren. **6** Regavo izeg no E Bomana ijienna no kegoinva iji jan makai nuvuon ijia jajuov. Jaka vajai fian abeknum jajuo ruain revo fun Godon Kaven Akai ijar ifejdiamga ja vuak iji faime jakak oimaren.

7 Ijefuon jar e Mesedoniako bu jana moik ijia karinva ijiga e Akaiako bu nana moik be igia karinva ijin eraneb bu God ma vierafejo iji unam ma iji kege nijaidiain.

8 Regavo E Bomana ijefuon vuak iji ja abe kuaimoinva iji fu ai Mesedonia ko Akaia ijesugin vainma bakin gavo fuka moik roinroin ijia vain. Ijefuon e fok bu jon izeg ja God ma vierafejo iji bun faim barenva ijefuon no irerafuon una vuak kafo kuardiakva bakin. **9** E fok vuak jon bun faim barenva ijefuon bu izeg no jon vuakga ja oijmuome afeduinva iji bur kuarduin. Regavo madu bur izeg ja god kafokafo kufui iji aregavo una God ma iji tavan bog ijia fivako ijefuon ja anerene ik rejo iji bur kuarduin. **10** Regavo madu ja Godon Farif Jesu fu guamga God fu keunama fu una urinma iji fu una kaf gufia ari ruakreno ja iji samuav. Regavo tavan rad fu una ruakma God fu e iji bu ise rejo iji fu ziegafiame ke arafiriak. Regavo noiiji fun Jesur karaunuinma ijefuon fuba no kege e ijienar arafuruok.

2

Izeg For fu mai Tesaronaika ijia ikreoinma ijin

1 Regavo efnun tavan iji no ja giak vuainva ijia irerag no rejo fu ja ifejdiainma iji jan koikjon vierafen. **2** Regavo ai Firifai no karinva ijia e roin bu ire ise nuvuon renva iji jan fain. Regavo no mai jon Tesaronaika vuainva ijia fu God nuvuon ijar ifejduomga no vuak fuon ma iji abe ja kuardiain. Revo e uruvana buka vuak ma iji no kuaivo iji bietduokuai reoij revo noka Godon

daro ijia giriesame vuak iji abe ja kuardiain.
³ Regavo vuak iji no abe kuardiainva iji no nor kufuime ga vuak ise iji ja biesiame kuardiainva bakin. Regavo vuak iji noka vuak ma ijesugin kuardiain. ⁴ Regavo no fun Godri usuibe guome ke unuinma ijefuon no irerag fu vierafenma ijia kuaimok. Regavo vuak iji no abe kuaivo iji no e iji bu oimardiakfuon iji kuaivo bakin revo no God fu oimaikfuon no ijin abe kuaiv. Ijefuon maiji God fu rad oinuvuon guf ijia guok.

⁵ Regavo jan vierafe vuak iji no abe ja kuardiainva iji noba ja biesiaknum soisoiga ja mon vajuokuai no ijegrenva bakin revo iji fun Godri guo vierafen. ⁶ Regavo iji no renva iji e fok jar no ke nidosuokuai no ijegrenva bakin. ⁷ Regavo noiiji no e mamkanuvo no Jesu Kuraison e afasor ijefuodo no ja kuriaikuriaikin igia vuak kuardiabatie iji fu marek. Regavo ijeg noba ren revo nom isuar vuak kuardiaknum jana oin. No asie iji fu amfuon samuagdiamo ijeg noka jana karioin. ⁸ No ja bomana oijmiavo ijefuon no Godon vuak ma ijesugin abe ja kuardiainva bakin gavo noka koiknuvuon oinuvuon ijekma kege ja vajia. Ijefuon maiji no vieraferga jaka ma e nuvuon. ⁹ Regavo efnun izeg no vajai fian abeknum giriesame ik reoinva iji jan vierafer. Regavo nakikmazak no ijia ik reoinva ijia noba ja arafiriame monfuon vo sinuomfuon ik ren. Regavo nom Godon vuak ma iji abe ja kuardiain.

¹⁰ Regavo irerag no reoinva iji jan guo ga God fuk fun guoin. Ijefuon ire iji no e iji ja Jesu ma vierafergo iji jon renva iji noka ire akai ijigam

unam ma iji ren. ¹¹ Regavo jan vierafe izeg no ja e besubesum samuagdiaknum ifejdiainva iji noka asoij iji fu afijaf samuagdiamo ijeg samuagdiain. ¹² No ja ejafiaknum ifejdiame kia, Ni unam ma iji God fu oimaikfuon ijia karifno kiain. Regavo jan vierafe God ijar ja ke uniainma ijefuon ja una e iji God fu oibuon iji samuagdiamo ijieni mazime sanainma fuon ijia funa karikno kiain.

¹³ Regavo madu ire be ja reja no gainva ijefuon no Godon oimarev. Ire iji ja renva iji no Godon vuak ma iji abe vuakga jaka vuak iji mukoi faime aben. Ja vierafe vuak iji fu emabuon vuak bakin revo fuka Godon vuak ijefuon ja vuak iji aben. Regavo vuak iji fu ma Godon vuak ijefuon e iji ja Jesu ma vierafejo iji God fu oijon ijia ifejdiaga ja e damuigin rek. ¹⁴ Regavo efnun ja Godon e iji bu ai Judia ijia Jesu Kuraison if ijia sirimamejo ijiebuon diak makai ijia jajia. Regavo e Jius iji bu e Judiako iji bu kam ise kafokafo buon renva ijeg jak bu ejon moik besum ijieb ja kam ire ise kafokafo ren. ¹⁵ Regavo e Jius ijieb E Bomana Jesu abevo e Godon vuak vieraferne kuaivo iji kaniava bu aoin ga madu bu no kam ire ise reduin. Regavo iji bu renva iji God fuka ba oi main revo madu e iji bu e fok karioinva iji ziegafia. ¹⁶ Regavo Godon vuak ma iji no abe e Jius bakin iji kuardiaga vuak ijar bu karauniakfuon iji bu e ijieb kuriairev. Bu ijeg kuriairejknun tavan bog ise rejo ijefuon iviakma ise buon ijar rarem. Ijefuon Godon ziemo iji fun buon namdo tavan rad God fu bu kege arafiriak.

For fu e Tesaronaikako iji giakafa buifuon

renma ijin

¹⁷ Regavo efnun noiji no tavan ukakbe ijesugin noba una ja biediak. Regavo noka usuibe ja uniainvia ijefuon no vek oinuvuon ijia una ja giakuai uruvana vieraferknum oij. ¹⁸ Noka una ja giak vuakuai vieraferen revo na For naijin tavan uruvana una ja giakafie vieraferj. Regavo no jon vuakregia Setan fuka unam nuvuon bijukurain. ¹⁹ Regavo oinuvuon iji tavan bog noka bomana vieraferknum joifuon oimarev. Ijefuon Jesu fu una ruakma no irerafuon no nifik fuon ijia ireme aroikaraknum oimarek? Ire kafo bakin revo jan jar vuak fuon ma iji no abe kuardiava ja mukoi faime ma vieraferen. Ijefuon E Bomana fu una ruakma ja nona nifik fuon ijia irek. ²⁰ Ijefuon noka ja giame aroikaraknum oimarek.

3*Timoti fu e Tesaronaikako iji giakafa vainma ijin*

¹⁻² Regavo efnun tavan uruvana noka ja giakuai vierafer vo vuak jon faikuai uruvana vieraferen. Regavo madu no vuak iji vierafero ijar ik nuvuon no rejo iji noba oimarknum rej. Ijefuon no e Timoti kuava fu jon vuakga no nuvuonkua ai Etens ijia karin. Regavo e Timoti fu nona ik besum reno revo fuk Godon ik reoino ijefuon fu Jesu Kuraison vuak ma iji abe e kuardiamon. Ijefuon no fu kuava fu ijia vuak jon faivknum ja ifejdiaga izeg ja Jesu ma vierafero iji ja griesame vieraferknum karikafa fu iji vuain. ³ Regavo e iji bu jon ire ise kafokafo renva ijefuon Timoti fu

vua ja ifejdiaga ire ise iji buba ja kam vajai fian miak. Regavo fu ifejdiaga ja jon ja ma vierafejo iji jaba arega jaka griesame Jesu ma vieraferkafa fu ijefuon vuain. Regavo jan vierafe ire ise ijeckin iji fun Godri roirinma ijefuon bu tavan rad ma nuvuon rega no afkin abek. ⁴ Regavo no uria ijia jana karinva ijia non kuardiame kia, Ire ise ijeckin bu nuvuon ruakno kiain. Regavo ire ise iji fu nuvuon rekfuon no kiainva iji fun iviakma rena jan giame vieraften. ⁵ Ijefuon no Timoti kuava fu jon vuain. Na ja vierafergafa fuka isediem ijefuon na Timoti kuava fu vua jon ja izeg Jesu ma vierafejo iji giame una kuardiekafa na iji kuava fu vuain. Na vierafero Setan fun ja biesiamma ja una unam fuon ijia vagavo irerag no kuardiaknum nijaidiainva iji jan arenvaro na iji Timoti kuava fu una giakafa vuain.

⁶ Regavo Timoti fu ja giakafa vuainma iji fun iviakma una ruain. Fu vua jon ma iji izeg ja God ma vierafejo ijiga e roin ja oijmiavo iji abe una no kuarduin. Regavo fu madu kuarduome kuo, Usuibe na ja giak vuainva iji ja vek oimarknum vieraferoij revo jaka una no guokuai vieraferfano kuin. ⁷ Ijefuon efnun noka vajai fian abeknum oifian uruvana biediai revo no vuak jon ja izeg God ma vierafejo iji faivga vuak ijar no ifejduomga no griesame ik nuvuon rej. ⁸ Regavo iviakma no faiga jaka E Bomana iji mukoi vierafeknum karinva ijefuon no madu no igia ma karine oimarknum ik nuvuon reoij. ⁹ Regavo iviakma no joifuon God oimarev. Ijefuon maiji jar mukorigia oimarknum rejo ijefuon no fuon

nifak ijia noka bomana oimarev. ¹⁰ No nakik-mazak no oinuvuon ijkema Godon sirimamene kuaga fur ifejduoga no una uiknik jon giakuai no iji vierafen. No vua giame unam kafo ja oijon ijia ma vierafe vo jaba griesame kegoijo iji una nijaidiakuai no iji Godon sirimamej.

¹¹ Regavo ivia no sirimame God Asoinuvuon kuaga fur fuonkua E Bomana nuvuon Jesuk unam nuvuon amarega no jon vuak. Ijefuon maiji Setanri unam nuvuon bijuinma ijefuon no bu kia bu unam iji abe samafrega no jon vuak. ¹² Regavo no vierafe E Bomana ijar ja ifejdiaga izeg no ja oijmiavo ijeg ja una jon oijmanamikfuon. Regavo madu no vierafe fuka tavan bog oijon ijia uruv madu vierafe vajiale ja e oijmiaknum kariok. ¹³ Regavo madu no vierafe E Bomana fu oijon guf ijia daro miaga ja unam ise iji aregavo una e akai rek. Ja e akai rene una God Asoi nuvuon ijefuon nifak ijia ireme E Bomana Jesu fu e akai fuon ijieni una ruakfuon iji samuak.

4

Unam iji God fu oimaikfuon ijia kariokfuon ijin

¹ Regavo efnun iviakma na vuak radkma iji isoime kuardiakrejo iji unam izeg God fu oimaikfuon ijia karivakfuon iji non nijaidiava jan ijeg kari rok. Regavo iviakma no E Bomana Jesuon if ijia darokma ja anadiame kia, Ni unam ma iji God fu oimaimo ijia ja kari roko ijeg una uruvana rejknun kari vaf. ² Regavo vuak fok no kuardiainva iji non E Bomana Jesuon if ijia

kuardiava jan vierafen. ³ Regavo God fu ijeg vierafen fu vieraferga jaka tavan bog unam ma ijesugin reoknum e akai igeg karik. Regavo barubara oijo iji jaka arek. ⁴ Regavo e besubesum a unam ma ijia vo akai ijia a barakon abekfuon iji a koikon vieraferkuon. ⁵ Regavo jab uri e iji bu God ba vieraferva iji matiame siroij igeg reok.

⁶ Regavo erar fu unam ise iji rene e kafobuon bara turamo iji fu kaifuon ijefuon ise rejknun unam fuon ma iji fu kegoino iji abe arafirim. Regavo vuak iji non usuibe ju kuardiame kia, Eraneb bu unam ise ijekin iji rekva E Bomana fu e iji kam arafiriakno kiain. ⁷ Regavo God fu vierafe noka e akai rene karivak ijefuon maiji fur no kege unuin. Regavo fu vierafe noba e kafobuon bara turak ga noka e akai rene kari vak. ⁸ Regavo God fu Kaven Akai fuon iji abe ja uniafdiaainma ijefuon vuak iji no iga abe ja kuardiav. Ijefuon erar fu vuak iji faime uzakma fu emabuon vuak iji uzamo bagavo fu Godon vuak iji uzam.

⁹ Regavo no irerafuon fas isoime ja kia ni kaifjon oijmiafno kiakva bakin. Ijefuon maiji jan koikjon vieraferne e roina ja oijmanamikfuon iji fun Godri usuibe oijon ijia vierafe vajiai. ¹⁰ Ijefuon ja e kaifjon roin Jesu ma vierafejo bu ai Mesedonia ijia karinva iji jan ijeg oijmiav. Regavo iviakma no una madu kuardiame kia, Ni iji ja oijmianamivo ijeg tavan bog oijmanamiknum vaf. ¹¹ Regavo madu no kia unam ja rekfuon iji mukorigia vieraferne isuar igia karine ik jon rekgavo e kafobuon unam jab ke iserdiak. Revo nin isuar igia karine imut jon ijia koikjon ik

rejknum karif. Vuak iji non usuibe kuardiainva iji no una madu kuardiav. ¹² Ijefuon ja unam iji mukorigia abekva e iji buba Jesu ma vierafejo iji bu unam jon faivknum giame bu ja agordiak. Regavo ja imut jon ijia ik rejo ijefuon jab ire kafofuon e roin sirvek.

E Bomana fu una rokon ijin

¹³ Efnun vuak igi no e iji bu Jesu ma vierafejo iji bu aoinva ijiebuon vuak iji abe kuardiav. Ijefuon jab e iji buba Jesu ma vierafejo iji matiame kari e iji bu aoinva ijiebuon oifian abek. Ijefuon maiji e iji Jesu ma vierafejo bu aoinva iji bu una urik. ¹⁴ Regavo no ma vieraferga Jesu fu guame una urin. Ijefuon God fu Jesu kuaga fu arime e iji bu fu ma vierafejo bu aoinva iji aferdiaga bu una Jesuna urik.

¹⁵ Regavo vuak igi fu E Bomana ijar no kuarduinma no iji abe kuardiav. Eraneb no nivek karinva ijia E Bomana fu una ruakma no e iji bu aoinva iji noba asidiame amur irek. Regavo bu e iji Jesu ma vieraferne bu aoinva ijieb amur Jesu biek. ¹⁶ Ijefuon maiji E Bomana iji fu fuonkua kaf gufia ari ruaknum kumeke Godon anera ikin fuk fu kumeke e fok bu Godon veg iji urino iji faik. Ijegrekega e iji Jesu ma vierafejo bu aoinva ijieb amur una urik. ¹⁷ E iji aoinva ijieb amur uriga ijiason e iji no tavan ijia no nivek karinva iji Godri migegare no aferduome buna besum vak. No besum vaga vana ijieb no ke utime ajie kaf ijia E Bomana iji biek. No ijia ajie vainki no tavan bog E Bomana ijienka kari vak. ¹⁸ Ijefuon ni vuak igi no kuardiavo iji abe jon kuaime ejafanamime

karif. Regavo jab karine e iji Jesu ma vierafejo bu aoinva ijiebuon oifian abek.

5

No amarkarame samuake E Bomana fu una ruakfuon ijin

¹ Regavo efnun ire igi bu ivedz rekfuon iji naba isoime kuardiak. ² Ijefuon maiji jan koikjo vierafen tavan iji E Bomana fu una ruakreno iji fu erar vieraafene samuakma bakin. Regavo fum e iji bu isuar naki niesakuai roko igege isuarigia ruak. ³ Rad e iji bu karine kuai, Noiji no ma karioijo kuaik. Regavo migegare ire ise be fu buon rek. Ire ise iji fu buon rega e iji buka bara iji fu am nafekafa vajai fian abeno ijeg vajai fian abek. E iji bu vajai fian abene uri sauikuai ai nisaik revo bu izeg sauikva bakin. ⁴ Regavo efnun jaiji ja e iji bu God uzame ise reoijo ijekin bakin revo jaiji ja sanainma ijia karij. Ijefuon tavan iji E Bomana fu una ruakfuon iji fu e niesamo ijeg ruakma jaka turanamik. ⁵ Regavo jaiji ja tavan sanainma ijia ga Godon sanainma ijia karioij. Regavo no e iji bu ise rene nakinma ijia karioijo ijeg karinva bakin. ⁶ Ijefuon noba e iji buba mukoi vierafejo iji matiame ni naoik gavo noka koiknuvuon griesame uri nisaiknum ok. ⁷ Regavo e iji buba mukoi vieraferknum ire ise reoijo iji bu naki ire ise rejo. Regavo madu e iji bu ire ise kafokafo reoijo iji bu tavan bog naki do kugi ij.

⁸ Regavo noiji no Godon sanainma ijia karioijo ijefuon tavan bog noka koiknuvuon samuaknum

karik. Regavo no unam izeg God fu tavan rad ise nuvuon ijia karaunuokfuon iji abe nigen nuvuon ijia at gigikin igege abesek. Regavo madu nok e iji bu bijakuai darer buon kege nakaimoijo ijeg no nuvuon God ma vierafejo ijiga nuvuon no oijmanamivo iji no ke oinuvuon ijia naga bur ire ise iji nuvuon roko iji rarek. ⁹ Ijefuon maiji God fu no kege vajai fian muokafa vieraftenma bakin revo fu E Bomana nuvuon Jesu Kuraison if ijia no karaunuoga no ma karivak. ¹⁰ Regavo E Bomana nuvuon Jesu Kurais fu nuvuon ise ijefuon guain. Ijefuon non aoinva ijia gavo no vek karinva ijia fu una ruakma no funa tavan bog kari vak. ¹¹ Ijefuon vuak igi na E Bomana fu una ruakfuon iji na abe kuardiavo iji abe jon kuaime ejafanamiknum ifenamime ire ma ijesugin oijon ijia vierafeof. Regavo ire iji jan iviakma rej revo na una kuardiavo ijefuon ni iji ja rejo ijeg biom ka mukorigia rene vaf.

Vuak radkma iji For fu kuainma ijin

¹² Regavo efnun ivia no ja vuak gigikin nijiamie kiav. Ni e iji E Bomana fu ke uniaga bu ja samuagdiaknum kuardiaga ja unam ma iji Jesu ma vieraferkuon ijia kari vako iji mukor igia agordiaf. ¹³ Ni Godon ik iji bu jon rejo ijefuon bu mukorigia agordiaknum oijmiaf. Regavo ni mukorigia afuime kari vaf.

¹⁴ Regavo no madu una vuak gigikin be kuardiav. Ni e iji bu ik buon rekuai uzavo iji una kuardiaknum e iji bu juvo iji vuak kuardia ejafiaknum e zazaikin iji ifejdiaf. Regavo ni e fok ijienia isuarigia oimafaime buna karine ik re

vaf. ¹⁵ Regavo e roin bu jon ire ise kafo rega jab una vef buon ire ise kafo rek. Regavo nin tavan bog jon ifenamiknum e fok ifejdiakfuon iji vierafecknum kari vaf.

¹⁶⁻¹⁷ Regavo ja Jesu Kurais ma vierafenva ijefuon God fu vieraferga jakat tavan bog fuon oimarknum fuon sirimamek. ¹⁸ Regavo madu ja Jesu Kuraison e ijefuon tavan iji ja afikin kafo bedia vo unam ma kafo biediakva iji nika una fuon oimaref. Ijefuon maiji God fu ijeg vierafer.

¹⁹ Regavo Godon Kaven Akai iji fu mian igeg oijon ijia naino iji jab abe udak. ²⁰ Regavo madu E Bomana ijefuon vuak iji e roin bu faime una ja kuardiavo iji jab faime uzak. ²¹⁻²² Ni ire fok mukorigia giame ire ma ijesugin igiame reogavo ire ise iji giame akardiaf.

²³ Na sirimamene God iji fu mukorigia samuagduoko no afuime kario iji kuaga fur oijon kege amardiaga buka mukorigia mardiak. Regavo madu na kuaga fur vajai jon ga kaven jon ga oijon ja vierafejo iji mukorigia ifejdiaga ire ise kafo buba unam jon kam arafiriak. No God kua fu ijeg ja samuagdia vake tavan iji E Bomana Jesu Kurais fu una ruakfuon iji abek. ²⁴ Regavo God fun usuibe ja kege afuon ren. Regavo madu fu e ir kufuikin bakin ijefuon vuak fok na joifuon sirimamejo iji fu keno kiek.

²⁵⁻²⁶ Regavo efnun ni nuvuifuon Godon sirimamef. Regavo madu ni kaifnuvuon ijia karinva iji nuvuifuon mukorigia anadiaf. ²⁷ Regavo no E Bomana ijefuon if ijia anadia kia, Ni fas igi na

isoinva iji abe daga e iji Jesu ma vierafejo bu jana besum afuim karinva iji bu vuak iji faif.

²⁸ Regavo na joifuon sirimamega E Bomana Jesu Kurais fu ja ma rediaga ja mukorigia kari vakfuon. Fun ijin.

**Godon Vuak Ma Ijin
The New Testament in the Namiai Language of Papua
New Guinea
Nupela Testamen long tokples Namiai (Barai) long
Niugini**

copyright © 2004 Wycliffe Bible Translators, Inc.

Language: Namiai (Barai) (Namiae)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

PDF generated using Haiola and XeLaTeX on 11 Nov 2022 from source files
dated 9 Oct 2020

05fbd25c-4000-5e47-9a8b-38bd704120d6